



REPUBLIKA E SHQIPËRISË
ENTI RREGULLATOR I ENERGJISË
BORDI

VENDIM

Nr. 112 , Datë 19.05.2022

KËRKESËN E SHOQËRISË “HEC - i TËRVOLIT” SH.P.K., PËR ZGJIDHJEN E MOSMARRËVESHJES NDËRMJET SHOQËRISË FURNIZUESI I TREGUT TË LIRË (FTL) SH.A. DHE SHOQËRISË “HEC - i TËRVOLIT” SH.P.K.

Në mbështetje të nenit 16 dhe 20, gërma “a” dhe “ë”, nenit 24, pikat 1, 2, 3, të ligjit nr. 43/2015, “Për sektorin e energjisë elektrike”, i ndryshuar; nenit 23, pika 12, të Rregullores për organizimin, funksionimin dhe procedurat e ERE-s, të miratuar me vendimin e bordit të Entit Rregullator të Energjisë (ERE), nr.96, datë 03.09.2016; Rregullores për trajtimin e ankesave të paraqitura nga klientët dhe për zgjidhjen e mosmarrëveshjeve midis të licencuarve, në sektorin e energjisë elektrike dhe të gazit natyror, miratuar me vendimin e bordit të ERE-s nr. 114, datë 08.07.2016 dhe “Kontratës për shit-blerje të energjisë elektrike ndërmjet Operatorit të Shpërndarjes së Energjisë Elektrike (OSHEE sh.a.) dhe Prodhuesve me Përparësi të Energjisë Elektrike”, miratuar me vendimin e bordit të ERE-s nr. 101, datë 23.06.2016, të ndryshuar; bordi i ERE-s, në mbledhjen e tij të datës 19.05.2022, pasi shqyrtoi relacionin e përgatitur nga Grupi i Punës me nr. 668/5 prot., datë 13.05.2022, “Mbi kërkesën e shoqërisë “Hec- i Tërvolit” sh.p.k., për zgjidhjen e mosmarrëveshjes ndërmjet palëve, shoqërisë Furnizuesi i Tregut të Lirë (FTL) sh.a. dhe shoqërisë “Hec- i Tërvolit” sh.p.k.”,

Konstatoi se:

- Shoqëria “Hec- i Tërvolit” sh.p.k., ka depozituar në ERE shkresën e datës 29.03.2022, protokolluar me nr. 6/6 prot., datë 29.03.2022 me lëndë “Vijueshmërinë e kontratës së shitblerjes së energjisë elektrike Nr. 227/15, datë 23.01.2020, nënshkruar ndërmjet shoqërisë “Hec - i Tërvoli” sh.p.k., dhe shoqërisë Furnizuesi i Tregut të Lirë (FTL) sh.a.”.
- Neni 20, gërma “ë”, e ligjit nr. 43/2015, “Për sektorin e energjisë elektrike”, i ndryshuar, parashikon të drejtën e ERE për të zgjidhur mosmarrëveshjet, në lidhje me ankesat e paraqitura nga klientët dhe mosmarrëveshjet e lindura midis të licencuarve, sipas parashikimeve të këtij ligji. Gjithashtu, ligji nr. 102/2015, “Për sektorin e gazit natyror”, i ndryshuar, në nenin 98, pika 1, njeh autoritetin e ERE për të zgjidhur mosmarrëveshjet ndërmjet të licencuarve në sektorin e gazit natyror, si dhe ndërmjet tyre dhe klientëve.
- Rregullorja për trajtimin e ankesave të paraqitura nga klientët dhe për zgjidhjen e mosmarrëveshjeve midis të licencuarve, në sektorin e energjisë elektrike dhe të gazit natyror, miratuar me vendimin e bordit të ERE-s nr. 114, datë 8.7.2016, në nenin 11, pika 11.1,

parashikon se: “Çdo i licencuar, ka të drejtë të paraqesë me shkrim, pranë ERE-s, një kërkesë për shqyrtimin e një mosmarrëveshjeje, të lindur mes tij dhe një, ose më shumë të licencuari tjetër”.

- Përveç sa më sipër, në nenin 20, pika 1, të “Kontratës për shit-blerje të energjisë elektrike ndërmjet Operatorit të Shpërndarjes së Energjisë Elektrike (OSHEE sh.a.) dhe Prodhuesve me Përparësi të Energjisë Elektrike” miratuar me vendimin e bordit të ERE-s nr. 101, datë 23.06.2016, e ndryshuar, parashikohet se: “Në rast të mosmarrëveshjeve, Blerësi dhe Shitësi do të bëjnë fillimisht përpjekje të zgjidhin konfliktin me mirëkuptim. Nëse Palët nuk gjejnë mirëkuptim, ato mund të kërkojnë ndërhyrjen e ERE-s”.
- Në zbatim të “Rregullores për trajtimin e ankesave të paraqitura nga klientët dhe për zgjidhjen e mosmarrëveshjeve ndërmejt të licencuarve, në sektorin e energjisë elektrike dhe të gazit natyror”, në nenin 12, pika 12.1.1, parashikon si fazë të parë të investimit të ERE pranimin e kërkesës me shkrim për shqyrtimin e mosmarrëveshjes.
- Rezulton se shoqëria “Hec- i Tërvolit” sh.p.k. është licencuar për prodhimin e energjisë elektrike me vendimin e bordit të ERE-s nr. 57, datë 02.06.2008, me licencën nr. 58, Seria NPM08K. Gjithashtu shoqëria FTL sh.a., është licencuar me vendimin e bordit të ERE-s nr. 199, datë 03.09.2018, në veprimtarinë e furnizimit të energjisë elektrike me licencën nr. F18, me afat vlefshmëri deri më 30.09.2023.
- Në të njëjtën kohë, VKM nr. 244, datë 30.03.2016, e ndryshuar, mbi “Kushtet për vendosjen e detyrimit të shërbimit publik, që do të zbatohen ndaj të licencuarve në sektorin e energjisë elektrike, të cilët ushtrojnë aktivitetin e prodhimit, transmetimit, shpërndarjes dhe furnizimit me energji elektrike”, vendos detyrimin e shërbimit publik për blerjen e energjisë elektrike nga burimet e rinovueshme të energjisë për shoqërinë publike të furnizimit në tregun e lirë, në përputhje me legjislacionin në fuqi dhe kontratën tip, të miratuar nga ERE.
- Kontratat ekzistuese që OSHEE sh.a., ka me prodhuesit me përparësi të energjisë elektrike janë transferuar tek shoqëria FTL sh.a., bazuar në aktet e brendshme ligjore/administrative ndërmjet shoqërive. Në këto rrethana palët legjitimohen për shqyrtimin e mosmarrëveshjeve nga ERE sipas përcaktimeve të akteve ligjore në fuqi.
- Në mbështetje të neneve 13 dhe 20, të ligjit nr. 43/2015, “Për sektorin e energjisë elektrike”, i ndryshuar, nenit 26, pika 1, të “Rregullores për organizimin, funksionimin dhe procedurat e ERE-s”, miratuar me vendimin e bordit të ERE-s nr. 96, datë 17.06.2016, me urdhrin nr. 75, datë 13.05.2022, është ngritur grupi i punës për shqyrtimin e mosmarrëveshjes ndërmjet shoqërisë shoqërisë “Hec- i Tërvolit” sh.p.k.” dhe Furnizuesit të Tregut të Lirë (FTL) sh.a., në lidhje me kërkesën e shoqërisë Hec- i Tërvolit sh.p.k., për zgjidhjen e kontratës me nr. 227/15 prot., datë 23.01.2020, lidhur ndërmjet palëve.

- Në zbatim të “Rregullores për trajtimin e ankesave të paraqitura nga klientët dhe për zgjidhjen e mosmarrëveshjeve ndërmjet të licencuarve, në sektorin e energjisë elektrike dhe të gazit natyror”, neni 12, pika 12.1.1, parashikon si fazë të parë të investimit të ERE-s pranimin e kërkesës me shkrim për shqyrtimin e mosmarrëveshjes, si dhe duke konsideruar se palët prej kohësh kanë vijuar komunikimet shkresore për këtë mosmarrëveshje vlerësohet e nevojshme pranimi për shqyrtim nga ERE i mosmarrëveshjes ndërmjet shoqërive.

Për gjithë sa më sipër, bordi i ERE-s:

Vendosi:

1. Pranimin për shqyrtim nga ERE të kërkesës së paraqitur nga shoqëria “Hec- i Tërvolit” sh.p.k., për zgjidhjen e mosmarrëveshjes ndërmjet shoqërisë “Hec- i Tërvolit” sh.p.k. dhe shoqërisë “FTL” sh.a., duke filluar procedurën për zgjidhjen e mosmarrëveshjes në përputhje me “Rregulloren për trajtimin e ankesave të paraqitura nga klientët dhe për zgjidhjen e mosmarrëveshjeve midis të licencuarve, në sektorin e energjisë elektrike dhe të gazit natyror”, miratuar me vendimin e bordit të ERE-s nr. 114, datë 08.07.2016.
2. Drejtoria Juridike dhe e Zgjidhjes së Mosmarrëveshjeve, të njoftojë palët e interesit për vendimin e bordit të ERE-s.

Ky vendim hyn në fuqi menjëherë.

Çdo palë e përfshirë në këtë procedurë mund t’i kërkojë ERE-s,- brenda 7 ditëve kalendarike nga data e marrjes së vendimit, rishikimin e vendimit të bordit në rast se ka siguruar prova të reja që mund ta çojnë bordin në marrjen e një vendimi të ndryshëm nga i mëparshmi apo për gabime materiale të konstatuara. Për këtë vendim mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETARI

Petrit AHMETI